

四庫全書

史部

欽定四庫全書

續資治通鑑長編卷三百四十四

宋 李燾 撰

神宗

元豐七年三月庚子朔以董戢為進奉使廓州刺史李察勒沁為勝州團練使

辛丑賜文彥博燕于瓊林苑上製詩以賜之 劉昌祚乞於米脂寨中路置堡樞密院言米脂寨去綏德差遠

然自收復以來雖有賊馬鈔略不為深患蘭州賊馬近  
遭傷阻恐懷憤激若興役之際萬一舉衆奔衝小失枝  
梧增長賊氣詔劉昌祚候地界了日別降指揮

癸卯詔知延州劉昌祚罰銅十斤坐擅牒本將改刺蕃  
落兵也

甲辰賜司農少卿廉正臣董誥紫章服正臣自言先提  
點在京倉場首尾六年收出剩糧三十四萬石草二百  
五十九萬束故獎之

乙巳詔詳定重修編勅所刪定官刑部侍郎崔台符中

書舍人王震各遷一官前刪定官知制誥熊本寶文閣

待制李承之李定賜銀絹百以書成也

要見初重修時熙寧九年十二

月二日元豐元年十一月十八日又三年五月十三日又十五日又八月九日又五年十月十二日又十二月

十五日又六年九月一日當考藝文志元豐七年崔台符等

修刑法志云初議修勅必先置局詔中外言法之不便與約束之未盡者議集然後更定所言可采而行者

賞錄其人書成詔中書樞密院及刑法司律官俾參訂可否以聞始咸平勅成別為儀制令一卷天聖中取咸

平儀制令及制度約束之在勅者五百餘條悉附令後號曰附令慶歷嘉祐皆因之熙寧勅雖更定為多然其體制莫

辨至元豐修敕詳定官請對上問勅令格式體制如何對曰以重輕分之上曰非也禁於已然之謂勅禁於未然之謂令設於此以待彼之至之謂格設於此使彼效之謂式修書者要當知此有典有則貽厥子孫今之勅令格式則典則也若其書備具政府總之有司守之斯無事矣於是凡八杖笞徒流死自名例以下至斷獄凡十有二門麗刑名輕重者皆為勅自官品以下至斷獄凡三十五門約束禁止者皆為令命官之賞等十有七吏庶人之賞等七十有七又有倍全分釐之級凡五卷有等級高下者皆為格奏表帳籍關牒符檄之類凡五卷有體制模楷者皆為式始分勅令格式為四熙寧勅十有七卷附令三卷元豐勅十有三卷令五十卷熙寧勅令視嘉祐條則有減元豐勅令視熙寧條則有增而格式不與焉二勅有申明各一卷天下土俗不同事各有異故勅令格式外有一路一州一縣一司一務勅式又別立省曹寺監庫務等勅凡若干條每進擬有牴牾

重複上皆籤改使刊正然後行之防範於是曲盡  
矣上諭安燾勅令格式已見二年六月二十四日 自

嘉祐六年始命開封府諸縣盜賊囊橐之家立重法後  
稍及曹濮澶滑等州熙寧中諸郡或請行者朝廷從之  
因著為令至元豐更定其法於是河北京東淮南福建  
等路用重法郡縣浸益廣矣凡劫盜罪當死者籍其家  
貲以賞告人妻子編置千里遇赦若災傷減等者配遠  
惡處罪當徒流者配嶺表流罪會降者配三千里籍其  
家貲之半為賞妻子遞降等有差應編配者雖會赦不

移不釋囊橐之家劫盜死罪情重者斬餘皆配遠惡處  
籍其家貲之半為賞盜罪當徒流者配五百里籍其家  
貲三之一為賞竊盜三犯杖配五百里或隣州雖非重  
法之地而囊橐重法之人並以重法論其知縣捕盜官  
皆用舉者或以武臣為縣尉盜發十人以上者限內捕  
不獲半効罪取旨若復殺官吏及累殺三人焚舍屋百  
間或羣行於州縣之內劫掠於江海船棧之中雖非重  
法之地亦以重法論

刑法志有此不得其時因  
編敕成附見須細考之

大理

寺丞郭槩言就江寧府劾陳繹三供罪狀不盡乞追攝  
詔陳繹所未承罪止以衆證結案

丁未賜京西都轉運司度僧牒百修轉般倉後再給五  
十 詔京東轉運使吳居厚修舉職事致財用登饒又  
未嘗創有更革止用朝廷舊令必是推行自有檢察勾  
考法度宜令戶部左曹下本官具事曲折從本曹刪修  
下諸路遵行庶課入繼有登辦者

實錄但云刪修以聞今從御集居厚

言竊謂聚人理財之義既已見之於易朝廷詔令所及



又復委曲詳備若推行滅裂即耗散偽弊悉隨而起臣  
將命東州承襲困窘深恐速得罪戾每依緣條法試為  
檢防愚者之慮無足收採今奉朝命具析敢不條上臣  
謹將已行案卷及應干令勅照會增損略叙施行次第  
為上下兩策或可以革一時之弊與夫久遠施行伏在  
詳酌謹隨狀上進

居厚進檢察勾考事件兩冊據  
崇寧二年八月三日詔旨增入

提

舉經度制置牧馬司言左侍禁楊嵩於河東共買馬二  
百八十八匹嵩初言河東路約買馬八千匹詔提點刑

獄司劾罪

朱本以為  
事小削去

戊申詔散直舊兩班人負自併為一班後未經裁定可  
減指揮使一名都知副都知押班二人於兩次轉負施  
行 詔諸路知州選官任官可為州學教授者送國子  
監審察令兼管 知洺州朝請大夫王荀龍通判奉議  
郎孟蘊各降一官坐差禁軍防送也

庚戌手詔劉昌祚本路軍氣自永樂不守以來折索摧  
喪非往日之比近聞諸將互出頗獲賊級軍氣小振則

豪勇異常之人宜有旌別將以氣作之使鼓率士心樂  
於攻戰今賜御緊線戰袍紅線勒刀金線烏梢弓虎紋  
韞韞銀纏捍槍朱漆圓排金鍍銀裝手刀各五十宜擇  
衆與之人量所宜賜之 詔諸軍轉負文字並送門下  
省仍依樞密院例宿直以門下省言諸軍轉負及換前  
班除授差遣或係臨時恩例若不送門下因此為例漸  
廢本省職事故也

辛亥詔支內藏庫絹十萬付環慶路經略司言賞功絹

見止四千餘匹故也

壬子降宣德郎監察御史朱京為宣義郎監興國軍鹽酒稅務初京言朝請郎董揚休前任沂州監司體量以疾曠官衝替法當與宮觀展磨勘一年有司審驗體量應格考功言陳乞宮觀留臺不許磨勘揚休雖非陳乞未有此例御史臺定當依本法與磨勘而朝旨不行朝議大夫致仕宋彥緣事故差任宮觀大略與揚休相類王珪蔡確由中書進擬與磨勘改太常少卿案揚休年

六十二彥年六十九皆未及七十老疾雖同長少則異  
揚休已該磨勘因差任宮觀而所乞不行彥則通理兩  
任宮觀留臺月日許與磨勘臣竊意大臣進擬有愛憎  
之私陰收其權歸怨於上望別定奪改正中書門下言  
京所奏與事實不同詔京具折而京言果不實故責之  
京初有言乃二月一日今并入此 前汀州通判奉議郎郭祥正勒停  
坐權漳州補僧道亨住持不當受金悔過還主及違法  
差送接人經赦也 御史中丞黃履乞與侍御史張汝

賢同薦御史從之

癸丑分命輔臣祈雨 手詔嗣王雖著品令然自國初

以來未嘗除授故有司不能定其恩數近除宗暉嗣濮

王宜下御史臺閣門參定以聞

二月十四日

又手詔京東

京西兩路保甲領於提舉司近已專置官提舉都保內  
所養馬則保民相干理難兩屬令霍翔呂公雅並兼保  
甲 詔付陝西轉運副使范純粹本路自用師以來歲  
費浩大朝廷前後應副雖已不貲而邊糴雜須尚未充

羨近擘畫令於京東徐州鑄到折二大錢二十萬緡計  
為四十萬貫之用欲歲運致往陝府下却以佐經費未  
知有無錢幣輕多之弊可速具奏純粹言本路見有新  
舊銅鐵錢九監鑄折二大錢約一百萬貫計小錢二百  
萬貫自來以本路經費浩大惟患鼓鑄不廣今若歲以  
徐州所鑄錢四十萬貫運致到本路只是增得本路鐵  
錢監歲額十分之二即未至有錢幣輕多之害雖然臣  
竊有所議輒因聖問願陳其略臣自未軍興之時參領

漕計至于今日方此財用艱窘乃蒙朝廷歲以見錢四十萬貫運至本路以佐經費而以問臣在臣之計得以自幸然而臣若但以本路得錢為利而不為朝廷久遠之謀則不忠甚矣非臣所敢為也謹條列如後一契勘本路沿邊諸處久來難得見錢逐處歲計除以本路課利所入應副支費外其所少之數並是於永興商號華陝等州錢監收積及於近裏諸處雇脚般運前去其所用腳錢糜費極多且如自陝府般鐵錢一萬貫至秦州



計用腳錢二千六百九十餘貫今若自徐州鼓鑄錢津運到陝府下卸臣即不見其得徐州元鑄鐵錢每一萬貫計用本錢若干并沿路水陸腳費又若干及搭入自陝府至邊上所費腳錢數目即一萬貫之內除本路腳錢銷費外紐算邊上所得實錢計若干竊慮枉有糜費若以本司言之則所備固多若為朝廷計之即恐不惟輕用國力兼慮經由之地上下勞費卒無已時伏乞聖慈更賜詳酌付有司會較施行一臣前自公府掾謫知

徐州滕縣與利國監相隣訪聞本監雖是出鐵而鐵性  
獷利惟宜製作兵仗即未知鼓鑄錢貫又復何如蓋陝  
西諸監所用鐵若性稍獷脆即難於磨漉多致破缺若  
性稍稠濁即金汁易凝流注不快錢上字樣率多昏暗  
與私鑄濫錢夾雜難別為害不細兼臣契勘陝西折二  
大鐵錢二十萬貫計用鐵三百六十萬斤木炭六百萬  
斤竊計徐州所用鐵錢料例與此不遠亦未知本處所  
產鐵炭每歲足與不足二十萬貫所用之數此雖臣私

憂過計亦乞朝廷會較施行一臣以謂飛運錢幣之術莫如走役商賈最為簡便臣竊見東南諸路歲以見錢上供不知其幾百萬水陸津運勞費不少既運致到京每蒙朝廷以公據名人於陝西入便却於內庫請出亦費行遣又竊見關陝以西至沿邊諸路頗有東南商賈內如永興軍鳳翔府數處尤多自來患在賣到見錢別無回貨今若嚴立關防符驗於陝西近裏及沿邊諸路名人入納齎給符驗直赴本貫州縣就便請領即公私

為利莫如此比借如恐沿邊諸路所入不多若只於永興軍鳳翔府等處入便數十萬貫必可取足如此則不勞公私便可飛運得他路見錢數十萬貫在關陝以西比之就徐州本鑄錢糜費遠脚耗折過半仍只到陝府下卸委似省便臣愚管見如此更乞朝廷會較施行又臣伏詳詔旨只是詢問有無錢幣輕多之害而臣於聖問之外輒陳煩說紊黷天聽罪在不赦然念事君之義知無不言惟乞聖慈深賜矜察

純粹奏此乃三月十四日今附本月日葉夢得

云三百萬緡蓋誤也已具注六年九月六日純粹八年四月十二日自右司出漕京東九月二日又奏此事可并考

甲寅福建路轉運副使王子京言點檢福泉漳州興化軍賣鹽價不同欲乞均定詔戶部如不礙見賣額鹽即依所奏

乙卯江淮等路發運副使朝奉大夫蔣之奇都水監丞承務郎陳祐甫各遷兩官吏減磨勘年循資有差以上批聞所開龜山運河於漕運往來免風濤百里沉溺之

患彼方上下人情莫不忻快其本建言及董後成者令

司勲第賞以聞故也

開龜山河在六年十一月二十八日神宗寶訓議河渠篇七年江淮

發運副使蔣之奇請鑿泗州龜山左肋至洪澤五十七里為新河以避長淮之險二月以成功聞之奇奏計至京繪圖來上上問曰龜山亦故道耶之奇對曰鑿山為渠非故河也方鑿河時獲錢十四其文皆開通識者以為開河必通之兆猶李泌之鑿砥柱獲戟文有平陸為平陸之應也上喜遂下詔曰所開龜山河於漕運往來免風濤百里沉溺之患其始建言及董後成者令司勲第賞以聞乃以之奇直龍圖閣進秩二等餘遷官減磨勘年循資有差六年十一月二十八日開河七年二月十六日遷兩官之奇除直龍圖閣陞發運使在哲宗即位後本傳可考寶訓誤也河渠志第二卷龜山運河熙寧中皮公弼議濬許元所開新河自淮陰屬于洪澤

四十九里以避長淮之險詔從之發運使羅拯議鑿龜  
山河屬於洪澤公弼力沮之上察公弼沮壞事功尤欲  
用拯議元豐六年會發運副使蔣之奇奏計京師建言  
上有清汴下有洪澤而風浪之險止百里長淮邇歲沉  
毀漂失公私之載何可勝計自諸道轉輸經湖江數千  
里之遠而覆敗於百里之近良可惜也上乃遣都水監  
丞陳祐甫經度之奇議欲上自龜山蛇浦下屬洪澤繫  
為複河取淮為源不置堰閘祐甫以其言奏因復陳工  
費浩大上曰工費雖大然為利亦博矣祐甫曰異時淮  
中歲失船百七十艘若捐數年所損之費足以濟役事  
上曰損費尚小如人命何詔遣之奇祐甫董役事起十  
二州丁夫十萬三十有奇於正月戊辰始事二月乙未  
奏功河亘五十七里有奇漕運往來無風濤覆溺之患  
上遣中貴人勞賜有差詔建言成功之人第賞以閒命  
之奇撰記刻  
石于龜山

賜權發遣熙州兼管內熙河蘭會路經

略司趙濟銀絹六百降勅獎諭以應副軍期趣辦也

禮部言誠州奏乞於中路要便之地建二寺大步山欲以靜化古融城欲以懷化為額乞歲度僧二人從之

浮圖寨監押殿直晁立貸死免除名勒停追兩官衝替坐令十將續連殺投降禿頭寨主王傑也 監察御史塞序辰翟思並守殿中侍御史

丙辰戶部言提舉京東路常平等司燕若古乞州縣積欠錢斛對移令佐催督看詳欲下提舉常平司具可以



權對移職位姓名申部關吏部從之 詔廣南西路諸

州召募土人隸雄略澄海其例物依寄招例支七千外  
更增錢邕州住營者每名五千餘各三千具數關牒見  
寄招路照會關牒 中書舍人兼侍講蔡卞奏待罪從  
官久無補報舉士應詔又非其才伏望罷臣職任除一  
在外差遣詔不許

此據御集要見卞  
舉何人或見朱本

丁巳大燕集英殿中燕皇子延安郡王初侍立于前宰  
臣王珪率百僚廷賀宣荅曰皇家慶事與卿等同深為

欣懌及珪等升殿上又諭王珪等復前分班再拜稱謝  
就坐久之乃退王年未當出閣上特令侍宴以見羣臣  
哲宗熙寧九年十二月生此年九歲也舊紀書丁巳燕  
羣臣集英殿延安郡王立侍于御坐之側宰臣王珪率  
百官廷賀及升殿上命與王相見  
久之王乃退新紀但書侍側廷賀

己未手詔熙河一路開創未久凡百用度錙銖較計尚  
未易供億其緣防城器具雖為麓惡之物極塞所直自  
亦不少若於禦賊施用未是要急誠為枉費可下經略  
安撫制置司於已頒百步守城法內據緊急名件隨宜

裁定聞奏毋致闕禦賊之用

庚申御崇政殿閱諸軍轉員凡三日 詔劉昌祚聞夏

人以諜妄傳漢家欲城葫蘆河遂發河南北人馬十分  
之九集於練家流宜明遠斥候知賊所向清野城守則  
為制賊上策上批詔尾云本路撓耕之兵數出俘斬殆  
以千數羌人俗重酬報令所聚人馬不見漢兵勢不空  
回必於諸路鈔略諸路中本路且有瑕釁必恐首撓賊  
鋒不可不厚為之備 詔御史中丞雜壓在六曹侍郎

之上 詔陝西河東經略司休息士馬更不出塞止為  
守禦之計候今秋別聽指揮 樞密院言馬軍諸指揮  
及諸班以年出職及軍功轉補今轉員約至運使各有  
剩數遷補不行詔權置下名軍使二百三十員捧日龍  
衛各四十拱聖驍騎各五十雲騎三十驍勝三十權置  
下名副兵馬使九十員拱聖驍騎雲騎各三十 知太  
原府呂惠卿言相度開麟府豐三州兩不耕地所收極  
厚可助邊計乞推之陝西路詔陝西路經略司詳酌施

行七月十日丁未所書當考此與彼相重但經略異耳  
七年春惠卿家傳有可刪入者今附此須更詳之家傳云  
道皆本路之民也既至思所以撫存如上意者先以尤  
急者三事上聞其一自五年軍興調夫與驢於民夫一  
名官支雇錢一千米一石驢一頭官支賃錢五百而民  
間自太原至潞州至河外一夫之費多至百千驢之直  
多至十千調驢三千頭至用錢四萬貫而官支才千餘  
緡其後有司復以為但至極邊未嘗入界追理所支其  
二河東於二稅外別有和糴支移勞弊與正稅同而災  
傷無蠲減之法自軍興民尤以遠輸為病其三河東轉  
運司每歲以斛斗十萬石饋鄜延民間之費幾至倍蓰  
乃能畢足而計司不敢以為言惠卿皆乞除之於是流  
移之復業者相踵也河東四路邊面二千餘里兵七  
萬人舊制時零交錯戰守不分其弊如陝西惠卿團為  
十二將二將以備北一將在嵐石一將在府州而八將

番戍河外凡所以措置一切用陝西之法自師出無  
功之後敵勢益張人心惴恐並邊退縮不復敢耕而新  
疆葭蘆吳堡間號木瓜原者膏腴特甚昔西人恃以  
強國者惠卿遣知石州趙宗本相視之得地可耕者甚  
廣乃雇五縣耕牛發將兵護其外而耕之旬日種地五  
百二十九頃又耕麟府豐州地七百三十頃弓箭手與  
民之無力者與異時兩不耕者九百六十頃邊民始復  
有稼穡之利而秋成則以糴之官中邊計賴之以紓惠  
卿乃上疏乞為營田其略曰今葭蘆米脂裹外良田不  
營一二萬頃西人名之實都倉或曰真珠山或曰七寶  
山言其出禾粟多而國中資多出於此也果能為之  
法稍耕其地則兩路新寨養兵之費略已備具而所資  
之內地者無幾矣況盡闢之乎然而所以不敢耕者前  
無捍衛而賊馬猶復出沒於其間而官中未有法以耕  
之故也夫捍衛疆場保護耕鑿莫若建堡寨而論者徒  
懲永樂之敗而不究其所以敗因置而不敢議此非計

也夫堡寨誠不可建則凡新舊城寨皆不可守誠可守則曷為而不建之以據其要衝而令賊得出沒於其間而不敢耕哉今葭蘆西南去米脂纔一百二十里若兩路各建一寨則每寨相去不過四五十里又於其間置小堡鋪以相照望則延州之義合白草與石州之吳堡克胡以南諸城寨凡千餘里之邊面面皆為內地其兵固可移之新寨則建寨之初雖當少益常戍而所益不多矣而闢其地利以贍軍用雖有資於內地而所資不多矣而河外三州荒閑之地與昔之為西人所侵及蘇安靖請棄之以為兩不耕者臣皆為法以耕之又及時就糴於河外而使河內之民被文移者量出脚乘之宜而革百年遠輸貴糴以困公私之弊一二年間財力稍豐則又通葭蘆之道於麟州之神木其通堡寨亦若葭蘆米脂之法而橫山膏腴之地皆為我有使河西兩路州軍城寨相通自足為一路彼舉國大入則固守勿戰以避其鋒其散居或小人則擇利時出以擊其惰縱未

撲滅彼無所歸不遠遁沙漠必請命畫疆則窺圖之望絕賓服之心固而邊境安矣竊以諸將既不能為一舉破敵之謀以經畫於前比奉詔旨令臣相度措置以為持久西邊抗敵之計宜無出於此於是具所以措置施行之法條件以聞而朝廷未暇為也持久抗敵之計實錄係之七月十日據八年正月二十七日所奏則營田乃不如惠卿所言也

辛酉詔永縣河南府六陵勾當官香火內品等自來承例遠離陵寢將迎使客自今一切禁止非準朝命輒離陵所者如擅去官守法京東路轉運司言鹽場收雜錢不係本息數乞歲支三百千為本司公使若別費用



及數外取索並以違制論不以去官赦降原減從之

壬戌手詔李憲昨奏果莊送馬十三匹乞買寫經紙事  
紙可就賜之而還其馬 詔太學外舍生周邦彥為試

太學正寄理縣主簿尉邦彥獻汴都賦上以太學生獻  
賦頌者以百數獨邦彥文采可取故擢之邦彥錢塘人  
也 同管勾京西保馬呂公雅言保馬癰瘡已立備償  
法其充肥未有旌賞欲乞保馬生駒每匹給絹一匹其  
充肥支銀牒仍乞借常平錢五萬緡均付諸州縣出息

為銀絹費每歲孟夏之月聚而收放可致蕃息從之京

東路準此

五年五月五日又九月十四日又七年二月八日又五月二十六日二十九日

京

東路都轉運使吳居厚言密州板橋鎮東枕大海四方商賈所聚並無垣墻乞調明年春夫厚築高垣以包民居置關鎖其海灘浮居小屋大半隱藏禁物盜賊並令毀撤仍委密州覺察從之京西路轉運判官沈希顏言本路酒稅監官闕員及不職乞不拘常制奏差公幹文武官戶部言内外官司罷舉已著令詔課利及萬緡

以上依希顏所乞

六月十五日可考

詔京東京西淮南路轉

運司聞本路久不雨可訪名山靈祠委長吏祈禱

甲子郟延路第二將西頭供奉官張禧追一官勒停初  
經略司命禧以將下兵至開光寺護輸稅人乘而禧擅  
以所部入米脂谷采木賊馬略輸稅戶殺人十四禧失  
於應接經略司劾罪上之仍收禁禧大理寺當禧罰銅  
五斤請劾官吏不應禁禧罪劉昌祚言禧故不稟本司  
處分殺無罪十四人有司議法不當情恐將佐觀望以

誤邊計故有是命 詔河東路經略司臣僚初奏斬獲

西賊一人仍體量西賊入寇及城寨使臣等應敵次第

并殺獲人畜燒蕩邑居詣實以聞

朱本以為事小削去當考其故四月七日

丙子朱本所增書或即此事

天章閣待制提舉仙源縣景靈宮王

居卿卒居卿麤俗吏特以言利至從官云

丙寅廣西安撫司走馬承受薛元方乞買荆湖北路鼎

澧潭郡等州土產良馬詔荆湖路轉運司詳度 誠州

言右司員外郎孫覽建議於新開路多星牧溪置二寨

堡已遣侍禁劉詔以兵往護役詔賜多星堡公使錢歲

百五十千土丁月給錢人三百

畢仲游云云當具覽使歸時

戊辰詔河北瀛定二州元豐五六年及接今歲提舉糴  
買封樁糧草司所糴糧數以鉅萬而散於諸處寄糴緩  
急屯集大軍遠近不相及兼新倉殆為虛設又兼糴處  
多無守具若令漸運入新倉則其費不貲不若致商人  
自運為使未知必須寄糴利害宜下本司具析李南公  
王子淵言寄糴法行之已久如保州廣信安肅北平等

軍在定州之北係極邊要切儲蓄之地真定府祁州永寧軍亦係次邊合行計置軍儲處與都倉相去皆近便緩急般取尅日可到或容本司計置允移即可以並歸都倉瀛州都倉寄糴利害如此今若使客人盡知官中必於都倉收糴非得高價未肯入中則必為之增價寄糴之利不唯於都倉無所嫌兼亦平準物價使輕重之權不為兼并所制從之

要見都倉凡幾所在甚州自何年立何年成

已已知相州滿中行言林慮縣南修合澗河水以濟民

用功既久又有孟兒等村鑿井取水十年百八十尺不及泉民以為勞而無功寧遠行汲水以初奉朝旨未敢罷詔罷之 廣南西路經略司言準轉運司牒闕錢支

遣逐急借裹衣等錢及相度諸州以五等戶正丁買鹽已三申尚書省不報今邊防軍費闕絕牒請同詳定數奏上批許彥先舉止狂躁輒以本職事妄移他司肆為張皇誼言闕乏內搖士卒之心外示弱蠻有虧邊備雖已差替可改為衝替事理重

許彥先緣何已差替當考

欽定四庫全書

續資治通鑑長編卷三百四十五

宋 李燾 撰

神宗

元豐七年夏四月辛未大食貢方物 西上閤門使寧  
州刺史王湛領成州團練使蕃官皇城使羅凌領忠州  
刺史如京副使解政為莊宅副使西京左藏庫副使李  
儀為文思副使並兼閤門通事舍人論出界功也 河



東經略司言蕃官三班借職屈德宜獲級詔以一級遷  
奉職其一級充本族巡檢 秀州軍事推官桑景昇侔

皆博徒以功勝陟錢

案原本有脫誤

并坐汙濫也

澶州觀城

縣保甲三百餘人持挺入舊縣鎮奪攘民財命呂公雅  
赴澶州監勅詔為首人郭萬領赴元作過處特處斬呂

皓依法決訖特刺配本州禁軍指揮雜役

二月一日十四日十七日

并四月二日十二  
日可參考別修

壬申權提點河北東路刑獄李仲甫言兩浙路歲散和

買紬絹錢乞依江東例止用舊十分之三給鹽下本路  
轉運鹽事司相度 詔開封府界三路提舉教閱保甲  
官并本司勾當公事官指使每再遣官教閱通比三等  
武藝及五分與減磨勘三年六分減四年七分遷一官  
以上每分更減一年至十分取旨如止及三分展磨勘  
二年二分展三年一分以下降一官

甲戌陝西轉運副使葉康直言準朝旨應副秦鳳路軍  
器什物本路見闕若盡製造十二年可了欲除本路應

副外更乞給賜詔據所乞三分給一

乙亥遼主遣歸州觀察使蕭浹太常少卿乾文閣待制  
侯庠來賀同天節 福建路轉運使賈青言昨提點江  
西刑獄編排虔州諸縣槍杖手立額依保甲為法歲一  
案閱民以為便江西一路可以推行詔下本路依虔撫  
州建昌軍等處見行法

丙子戶部言本曹每歲收支常平免役場務義倉金帛  
米數及田產已佃未佃已賣未賣水利或增或廢前此

未有以勾考乞從本部立法從之 河東經略司言三

月中旬西賊夜入安豐寨境焚民居殺掠詔遭焚斃者

依例支賜

三月甲子墨本所書當參考

提舉府界保甲司括畿內

馬凡得三千四百七十六匹詔劉瑄以給教騎人

丁丑京東都轉運使吳居厚言去年收息錢內以七萬

三千餘緡給河東保甲司賞賜支用詔黃廉據數交割

石得一奏接伴遼使下親從官隨行虧法乞令過位

覺察詔許之其入位與北人私相交易及轉達事情者

察之餘勿舉

朱本

陝西轉運副使葉康直專計置廊延

路糧草

京東東路提舉常平等事燕若古言沂登密

青州人田訟最多乞擇三五縣先方田詔候豐歲推行

八年十月二十五日罷方田

賜饒州童子朱天錫五經出身天錫

年九歲禮部試誦七經皆通上召入禁中取諸經試之

隨問即誦嘆曰此童誦書不遺一字又無所畏懼乃天

稟也延安郡王時在旁上指天錫而撫王曰汝能如彼

誦書乎面賜天錫錢五萬使買書以歸戒以後無廢學

天錫後無聞或當削去并十月庚辰其弟天申上指天錫云云據林希野史增入希時任禮部郎中實主試天元豐七年甲子四月番陽人朱擬携其子天錫年十有一能誦五經語孟凡百卷詣登聞自陳有旨送禮部試驗即召天錫詣部試以五經各五篇語孟各三篇應聲如流又使秉筆自書其鄉里姓名部為保明作奏神宗召赴睿思殿親試易乾卦禮樂記周禮考工記皆全篇百餘通宮人環視天錫殊不懾哲宗時九歲為延安郡王侍膝下神宗指天錫而撫之曰汝能如彼誦書乎面賜天錫五經出身仍賜錢五十千使買書以歸再三戒以不要廢學

戊寅客省副使曹誘言乞本省治事畢候三省樞密院出方計出局詔客省四方館所治職事全簡少徒糜占

人吏端坐無補可令治務罷即出 上第六女卒輟視

朝三日追封華國公主年才五歲母德妃朱氏也

庚辰罷集英殿大燕命宰臣賜遼使御筵于都亭驛

舊紀

云以華國公主喪罷同天節燕新紀不書

陝西轉運副使奉議郎范純粹

為左司員外郎

除郎不必書因欲載范純仁知河中故書事在五月辛酉

辛巳手詔李憲每年兩番西使到來常求市行牛角甚

急若不與一二聊慰其意則情色怏怏頗傷朝廷待遇

遠人之厚故歲歲常與之三兩對乃可厭其竒好即今

有司與禁中見闕可廣收市五七對以進每歲准此

京東西路轉運判官沈希顏言西京創蓋倉敖其費無  
慮五萬緡先給到度僧牒百道不足支用詔再給五十  
道 提舉河北東路保中司言大名府朝城澶州觀城  
等縣相州臨漳縣保甲百姓等羣以解質為名公行彊  
取錢物乞嚴立約束內未獲人每名賞錢二百千募諸  
色人告捉自今保甲輒敢如此並乞依此立賞詔從之

此據御集附奏裁前二月一日十四日  
十七日四月二日并此十四日當考

詔河北保甲司



以保甲買賣質借投託為名狀實彊盜應在各所粉壁  
曉示犯者情涉凶惡罪不至死奏裁 詔諸將官差經  
親民兩任人副將差經一任人陞一任為權陞兩任為  
權發遣 戶部乞改市易下界依舊為權貨務其上界  
為市易務從之 廣南西路經略司言已自融口通開  
石門溪峒路欲於新路側創僧寺化諭蠻人乞給度僧  
牒五道及降御書歲度僧一人從之

壬午詔陝西路提舉保甲東上閤門使狄詠朝奉郎胡

宗回各遷一官勾當使臣雷勝等七人減磨勘年有差以按閱集教官奏論也 鄜延經略司言新復四寨深

在生界未有堡障應接若遣人牛耕種或恐見侵略勢不萬全乞候地界了日施行從之

三月庚申及七月丁未當考

詔

四方館使榮州團練使知蘭州王文郁子右班殿直師古三班奉職師魯師孟各遷一資以熙河蘭會路制置司言昨夏賊圍蘭州師古等皆守城晝夜力戰也

甲申以涇原路經略使寶文閣待制盧秉為龍圖閣直

練使麟以討西賊功乘以措置麟軍馬出界有勞也

乘傳

云西賊既犯熙寧乾興隆德寨乘夫備禦坐落待制未幾復職蒞蘆河川開噶平距寨二百里乘諜知其恃險不為備乃密遣姚麟彭孫掩擊之斬獲萬數牛羊馬駝不可勝計捷聞上大喜進龍圖閣直學士

湖

北轉運使都鈐轄司言誠州準朝旨選使臣招納西南

一帶溪峒并開路畢功詔右侍禁劉詔遷一官減磨勘

二年權誠州軍事判官陳尚能為宣德郎軍大將蔡義

轉三班借職右班殿直楊昌堯王戟楊晟臻各減磨勘

三年李開減六年召募進士梁傳郡州司士參軍李夔  
並為三班差使吏兵支賜有差

乙酉溪峒楊晟敢等十五人授左右班殿直者七人奉  
職者三人借職者五人楊晟臺別賜絹五十餘賜絹有  
差湖北轉運鈐轄司上知溪峒州授漢官人招納開路  
功也

丙戌景靈宮官言芝草六生於天元殿門 廣南東路  
轉運副使孫迴提舉常平等事朱伯虎各降一官知廣

州王臨落寶文閣待制知濠州通判畢居卿司句文字  
連希元並衝替臨坐鞠孫迴受求囑居卿隨從臨迴不  
檢舉轄下兵替換優重差遣及失出入鄧滿等罪伯虎  
奏事不實伯雄鞠何卿私鹽事不盡諤鞠石大受事不  
盡大受以官板造匣拷平人希元隨順雖會赦降特責

也六年四月二日郭緊勘迴元豐八年十一月王臨自  
陳私家榮遇其略云臣在廣州二年因發摘一作過  
賊吏曾具事狀奏聞後來朝廷因臣僚言本路運使孫  
迴是郭緊舉主黨庇孫迴出脫了賊吏罪狀却來勘臣  
作上書不實是時臣為在遠方不敢申訴蒙恩落職差  
知濠州方欲具因依奏聞值先皇帝服藥以至上仙不

曾聞陳此事附見當考舊紀書知廣州王臨鞠事受請  
囑落實文閣待制知濠州新紀不書孫迴紹聖元年

八月丙戌  
為戶中

給事中韓忠彥言朝奉大夫俞希旦權發

遣祥符縣希旦近知滑州以拷無罪人死衝替應入監  
當祥符為朝廷選闕始著令乃首選希旦恐非立法擇  
人之意詔改差人御史臺閣門言本朝舊合班儀嗣

王在郡王上宗姓又在同列之上近例郡王領使相者  
得吏二人前引雖出持旨緣嗣王恩數尤宜加隆今參  
詳嗣王若止隨本官立班當在本班之上使相即用雙

引從之 荊湖路相度公事所言邵州時竹縣歸明侍  
禁楊昌嚮於上里堡建一佛寺乞賜名額及許度僧詔  
賜為感化寺二年度僧一人 詔定州路都總管司以  
忠猛一指揮分入驍武第七第八第九並帶請受 河  
東路經略使言將領張世規等出界至明堂川遇敵有  
功人乞酬獎詔張世規死賜其家絹五十匹子孝經遷  
一資

丁亥朝散大夫知均州張頴直龍圖閣知廣州頴言謫

守偏郡遽蒙牽復然臣二子一孫相繼亡歿孤老無託慮因此不任事伏望矜憐檢會前奏除臣一宮觀差遣

乃詔頡罷直龍圖閣提舉洪州玉隆觀

五月二十九日丁卯乃除宮觀

今并書頡本傳殊不載此據御集

李憲言疾病乞罷任詔候與夏人

分畫地界赴闕

戊子三省言工部郎中權左司范子奇言尚書左右司獨創增吏額分為別司非是欲乞依門下中書省例每有判送文字更不離房事重者郎官親呈事輕則擬定



令本房請判筆從之令左右司著為令其吏人遣歸逐處中書省言汀州軍賊藍載等行劫走梅州界又殺惠州歸善縣巡檢詔權宜州沿邊溪峒都巡檢左班殿直閣門祇候程建乘驛與提點刑獄司選募兵民土丁鄉丁槍杖手百人給口券隨行捕殺其去賊百里內不拘路分捕盜官並聽程建處分獲賊首人授班行賞錢五百千次頭首三百千其餘徒黨除依條酬賞外更支錢百千許徒伴自相殺併告首亦推恩大理卿王孝

先言本寺獄空降勅獎諭仍詔自今有司上獄空令御

史臺刑察案實上以開封府大理寺比歲務為獄空恐

為文具以希賞故也

舊紀書戊子大理寺獄空新紀不書

中書省言河

北路頻奏羣黨一二十人以至三二百人盜取河隄林

木梢芟等欲令監司體量有無如盜跡明白即依累降

指揮督捕如續有盜河隄林木梢芟等非凶惡羣黨一

面依此覺察收捕月具人數捕獲次第以聞從之 賜

涇原路經略司度僧牒百修德順軍靜邊寨城

朱本簽貼云元

書德靜軍城非是今  
以十五房聖旨修改

辛卯上批范子淵乞發夫萬人重修直河適當農時非  
次調撥初出於不得已今河口既未成功則其他埽岸  
皆不須為之可更不起發其見在河上急夫亦令放散  
上以子淵所修直河不為功徒費工料以數十萬計故  
也既而子淵自言兩修進鋸牙河口幾塞不虞漲水及  
風雨暴至功敗於垂成乞候霜降水落修閉詔子淵降  
一官仍不理提刑資序

八月十六日罷修  
子淵建言開廣武河導水回遠  
韓駒云范

則京城常無淹浸之慮踰年役不就故責詞云汝以有限之財興必不可成之役初神宗喜其言及罷役闔臺論之才貶一官

駒所云當考

詔諸遞鋪轉送金字朱牌無遲滯四

次者轉一資或賜絹五匹餘每次絹一匹 又詔客省

四方館使副各領本職外官最高者一員仍兼領閣門

事 給事中韓忠彥言去年七月乙巳詔給事中駁正

事赴執政稟議如有異同即據狀取旨今月丁亥門下

省得旨舉駁事依中書舍人封還詞頭例庚寅中書奉

旨給事中駁事赴執政稟議如有異同即具狀繳奏臣

詳中書省再得指揮乃是不許依舍人封還詞頭例但改舊文據狀取旨為具狀繳奏而已竊以給事中與中書舍人職任頗均如有所見一則不稟白而聽封還一則許舉駁而先稟議於理未允久失申明昨蒙處分事體方正況朝廷已施行事三省僉同給事中或有管見仰裨萬一即是已與執政異論自當求決於上豈宜更稟可否於執政乞依丁亥詔所貴兩省官輕重體均獲申獻納之分從之時章惇為門下侍郎乙巳詔乃惇意

也畢仲游作忠  
彥行狀可考

壬辰朝獻景靈宮至天元殿觀芝草宰臣王珪等稱賀  
仍宣從官以上賜茶自是朝獻畢皆御齋殿賜茶是日  
將至繼仁殿攝太常卿趙彥若度上必哭因附入內都  
知石得一奏之上遂不哭繇是中元朝獻唯上湯一慟  
而已

癸巳西賊犯安塞堡

五月四日奏到新紀夏人寇延  
州安塞堡將官呂真敗之五月一

日并十九日可考  
紀書第五將呂真敗之

甲午上批近中書省言提舉河北路保甲狄諮對執政  
官言所部見教保甲借戶馬二萬餘匹初疑所言非實  
今據本路承受奏數乃極相遠可下諮具析以聞

朱本  
新本

並削去存此可見當時提  
舉保甲官所言多不實也

河東路提舉常平司言去

年災傷民戶闕食義倉穀不多乞於常平封樁糧支三  
五萬石賑濟從之 知荆南朝議大夫孫頌降敕獎諭

賜銀絹二百轉運副使朝奉大夫祕閣校理趙楊轉運  
判官承議郎高鏞知誠州西京左藏庫副使閤門通事

舍人周士隆各遷一官以招納潭溪上和等處歸明人  
及開道通廣西融州王口寨功畢也 詔簡中保寧六  
指揮所闕人數依蘭州創置壯城指揮例於團結廂軍  
投換每指揮額外量增五十人以備逃亡填闕令經制  
司依例給轉軍錢 京東路都轉運使吳居厚言徐州  
利國監鐵柔良堪用乞置實豐下監每歲除供給公使  
外鑄折二錢二十萬緡委清河輦運司以次附帶上京  
寄納却令三門輦運司具舟載至河中府因回脚鹽車



入陝府轉移用度歲歲如此不為無助乞從臣相度條  
畫立法詔畫一具合費用及自利國監至京脚直以聞  
今約鑄折二鐵錢二十萬緡當費用及至京脚直計萬  
五千四十緡詔付戶部關工部並如居厚所奏 詔東  
南諸將無馬處並改造步人器甲

乙未詔襄州編管人劉彛放逐便 密州民苗茂投匿  
名書誣告板橋鎮監官張獻臣謀反有司言茂已經赦  
詔特杖脊二十刺配沙門島

丙申詔陝西軍須經費錢物近已降指揮各為一窠支

用其令京師總計司勾考侵冒

初置總計陝西軍須錢物所實錄不詳今全用

御集本文  
庶易曉也

復置兗州鄒縣

舊紀書  
復鄒縣

五月己亥朔御文德殿視朝召輔臣觀麥于後苑宣

德郎校書郎邢恕為著作佐郎

十一月乙巳遷職方

降授宣德

郎葉祖洽為校書郎祖洽初除知湖州上批祖洽熙寧

首榜高第可與秘書省職事官也

涇原路經略司言

自今沿邊將官城寨使臣坐事衝替去再下本司察審

軍前得力人量事大小於酬獎折除或展年降官依舊在任從之詔吏部立法

六月辛巳可并此

詔鄜延環慶涇原

熙河蘭會河東路各給空名宣頭劄子二百

庚子詔荆湖南提舉常平司會計兩路所置溪峒州縣

城寨歲費實數以聞從右司員外郎孫覽請也

此月十一日

月一日六年五月十二日可考

詔自京選將校補廣南諸軍將校者

並官給路費

壬寅詔知延州劉昌祚去月癸巳西賊犯安塞堡第五

將以少擊衆獲其酋豪非將副謀滅士卒用命豈能如此若無非常之賞何以使勇於公戰者知勸除朝廷已特支外可以經撫庫金帛或御前降去銀器先賞衆所親見用命有功之人其諜知賊馬信驗者優予酬獎初賊數萬寇塞門昌祚遣米贊以本將拒之斬級一百一十六殺統領伊實巴特瑪副統軍密烏瑪大首領鈴轄等五人伊實巴特瑪密烏瑪實主永樂之事至是中外稱快因圖形以進上喜甚遣近侍即軍中慰勞諸將皆優擢

此據張舜民墓誌昌祚傳亦同新舊紀已見四月二十四日癸巳又五月十九日丁巳可考

龍圖

閣直學士權知開封府王存為樞密直學士再任存辭不拜免再任 詔三路保甲借民私馬習藝者聽依舊甲辰邢州司法參軍鄺延經略司勾當公事李夷行為承奉郎經略司上夷行隨軍獲一級也 侍御史張汝賢言比部員外郎宇文昌齡倚任吏人鄭世隆自守當官差權正名令史世隆用事援引使臣趙元為主事而元不曉錢穀昌齡庸暗偏任小人竊恐敗事詔昌齡具

析

朱本云具析到無施行合刪  
今復存之昌齡墓誌可考

上批司封員外郎呂

升卿乃呂惠卿弟奏乞往河東受辭既非朝廷專命但  
與告歸少異爾可特依所乞不住請給支驛券仍帶親  
隨吏升卿初乞依奉使例故也 又批京東東路第二  
將歐育昨防托修永樂城移疾於米脂寨及以書間諜  
沈括种諤可罷將官 賜鄜延路經略司見錢鈔五十  
萬緡乘秋稔市芻糧以劉昌祚言軍資庫及轉運司軍  
須年計才可支三兩月也

丙午宣德郎大理評事咸平來之邵為監察御史用中

丞黃履薦也

八月丙子罷

詔內人朝陵諸陵使臣毋得差

伎樂迎送著西京令

丁未以供備庫副使文貽慶兼閤門通事舍人以父彥

博致仕推恩擢之西頭供奉官武欽蕃官西京左藏

庫副使歸仁各遷一官文思副使折可適侍禁嚴顯殿

直耿端彥齊誠減磨勘二年半權河陽節度掌書記張

績循一資鎮寨使臣分三等減磨勘年賜綰以根括蕃

兵論賞也 環慶路走馬承受公事黃誥乞令諸州軍城寨積石以備守禦詔下陝西河東路施行 供備庫副使知火山軍康曷衝替以在任籍行人糧斛故也 詔自今高禡祝版與配坐並進書

已酉詔皇后父祖墳寺左街資福禪院可除每年撥放外遇同天節度僧二人紫衣一人 荆湖路相度公事左司員外郎孫覽言沅水已招懷結狼九衙等百三十餘州峒乞委本州隨其風俗量宜約束不必置官屯守



自困財力廬陽麻陽之間有生莫徭五百餘戶乞招撫  
補授令把托道路自誠州至融州融江口十一程可通  
廣西鹽乞許入錢於誠州買鈔融江口支鹽增息一分  
可省湖北歲餽誠州之費辰沅州準此徵誠蠻多典賣  
田與外來戶乞立法溪峒典賣田與百姓即計直立稅  
田雖贖稅仍舊不二十年蠻地有稅者過半則所入漸  
可減本路之費乞下誠沅邵三州施行又沅州官水陸  
田山畬乞許射佃候耕墾熟限年立課辰州土丁三千

自建誠沅州分在逐州屯守裹糧番休相繼於道人力  
不易欲乞募歸明人及內都每土丁十人兼雇四人漸  
可減罷土丁緣邵州屬湖南誠沅州屬湖北融州屬廣  
西地跨四州分屬三路緩急措置不相照應欲乞誠沅  
融邵四州內擇地里居中要便一州令知州帶提舉誠  
沅融邵四州緣邊溪峒兵甲公事或緣邊安撫都監名  
目如逐處溪峒有合措置並許申稟提轄抽那應副詔  
誠州買廣西鹽立蠻人地稅免租課佃官地並施行其

乞誠沅融邵四州擇知州帶四州兵甲事下逐路相度

此月二日七月四日八月一日六年五月十三日可考

初朝廷既治五溪而蠻

獠介荆湘桂管之間官兵鎮守勢不能相屬數因侵掠  
覽奉使相視要害增築障塞道荆湘桂管溪峒使相通  
達兵不留行蠻費大省而患亦息會議者欲招徠誠州  
西道胡耳等而辰沅又欲籍蔣波六獠人為民覽曰西  
道胡耳之蠻猶禽獸也即奏罷之及還見上因極言微  
誠內屬當時從事者官過其望雖趨走給使之賤皆欲

資蠻以為官未有已期蠻徭散漫山谷不能羣聚說諭招徠宜無難者然地不可賦人不可使廣無賦之地籍不使之民而大農之費累百巨萬願畀之郡縣羈縻之不以累中國後有言者唯陛下察之上納用焉

此據畢仲游誌

覽墓附見五月十一日覽奏請後五年十一月十二日周士隆云云可考

環慶路經略司

乞增馬軍三千騎防秋詔發在京馬軍五指揮權駐邠寧州支十分馬 詔高麗人齋王子僧統書及金銀遺秀州僧淨源源有答書即明州移牒報之

庚戌龍圖閣待制知桂州熊本賜銀絹三百仍降詔獎諭以招納廣南西路潯融王江溪峒蠻并開路功畢也

其勾當文武官趣經略司上功狀

五年七月八日本知桂州六年六月四日

辨正疆至七年六月四日除吏侍八月九日詔候辦正赴闕十月二十二日賜交趾詔此辦正事也開路功此月十一日巳酉二十七日乙丑六月十三日辛巳八月一日戊辰九日丙子可考崇寧三年王祖道云云當并

考

詔昨西賊圍蘭州有投來蕃部倫約堯先報最為信

驗與遷三資如不願遷資支錢三百千 雄州言主管

覘事人馬傑探報北界事有驗詔與二班差使 詔涇

原路經略司促姚麟速上出界將副部隊將下元部馬  
步軍人數以聞欲行賞也 詔北界牒理會寧化軍差  
人過天池地分捉拏人口事可下經略司契勘緣故詣

實疾速依理施行迴牒訖奏

御集

辛亥權知開封府龍圖閣直學士王存為兵部尚書存  
固辭且言左丞王安禮之妻乃臣故妻之妹法亦當迴  
避詔不許後旬日改戶部尚書

改戶書乃二十  
五日今并附此

詔提

舉河北永興秦鳳等路保甲司官各兩員自今奏請文

字並聯書機速事不用此法 詔自今提舉保甲武臣  
須委有面陳事即許夏季入奏

壬子踈決在京獄因彊盜鬪殺輕者減一等雜犯抵死  
降流流以下第降杖以下第降以下釋之開封府界諸  
縣準此

兩紀並  
書此

西頭供奉官劉奭為閤門祗候後母

得為例奭永年子章獻明肅太后族孫故擢之 詔環

慶路土兵三千人留戍廊延歲餘人情非便其令罷歸  
癸丑龍衛軍使李真換右侍禁減磨勘四年為本路隊

將從熙河蘭會經略司奏也 詔遣使案閱將兵武藝

將副應殿最者最不及五分殿不減三分不賞罰

乙卯詔著作暫闕官校書郎或正字兼權 龍圖閣直

學士定州路安撫使蔡延慶奏伏望下都總管司今從

定州河北駐劄第一第二將每月一次輪馬步軍一指

揮赴州衙教場帥臣親按閱提舉詔令依將敕施行

案記

十八  
日事

丁巳皇城使忠州刺史呂真領嘉州團練使米贊為內



園使雄州刺史內殿崇班張仲元為內殿承制閤門祇候以上批安塞敗賊實由呂真斥候明審米贊得以收漢蕃入堡安塞被圍即領所部應援與副將合力驅除雖斬獲不多亡失過甚推其存心忠勇不以彼我為念宜獎之以勸協力國事者贊等以單孤一寨守兵不滿千人却賊數萬斬獲著名凶悍酋豪十數賊喪氣逃遁與前後出寨俘斬老弱不同可優厚推恩故也

四月二十四日

并此月四日可考

詔自今客省四方館閤門暫闕官即互權

已未河東路提舉常平司言提舉河東保甲乞借糧於  
停積之家貸闕食保甲常平司以常格止絕若貸非保  
甲戶即為侵越已奉詔聽本司施行勘會保甲司勸誘  
多勒令出辦教事錢糧乃其本職賑濟當關本司豈非  
侵越詔提舉保甲司放罪提舉常平司撥糧二十萬石  
約保甲隨處封椿保甲司有災傷奏聽朝旨賑濟河北  
陝西準此河北等路各十五萬石永興等路各二十萬  
石秦鳳路各十萬石 提舉河東保甲司言保甲並起

團教乞輸小保人戶逐村修鋪屋備更鼓巡宿從之

庚申通直郎寶文閣待制知潭州何正臣奉議郎提點  
湖南刑獄劉載各降一官通判潭州李綱罰銅十斤正

臣知廬州載綱並衝替綱坐私忿提點刑獄司吏教人

舉首而案其罪正臣載坐互論奏故以不實也

五年五月二十

七日正臣知潭州

詔明州昌國西監巡檢司招土兵百人於

明州崇節指揮除其數以鈐轄司言昌國西監兼岱山

鹽場控扼海道也

詔中書舍人蔡卞給假一月令往

江寧府省視王安石疾病

此據御集八月三日催赴闕

辛酉白虹貫日

兩紀並書

正議大夫知筠州滕甫知湖州

正月乙巳可并此

朝散大夫直集賢院權管勾西京留守司

御史臺范純仁權知河中府官制初行上欲召純仁用

之王珪蔡確言純仁好異論且疾病不可用及純仁弟

純粹由陝西轉運副使入對上問純仁無恙否純粹對

以實上悟尋有是命

此據邵伯溫聞見錄伯溫云即除龍圖閣誤也純粹除郎在四月庚

辰純仁至河中時督教保甲甚嚴非老弱不許在家農

事皆廢純仁上䟽言竊見陝西今夏二麥將欲成熟要衆手併力收獲入倉當如寇盜之至若稍過時或值風雨則所損極多不惟可惜一年民力耕種之勤况當邊陲用兵之際糧儲不可少乏緣今來保甲並是彊壯之人却以五日一次教閱有妨農事又况夏熱筋膠軟弱人力不健非閱武之時伏望聖慈特賜指揮應令保甲於此農忙之際權住教閱將來冬寒農隙却令補填合教日數所貴不奪農時人不乏食又百姓兩丁之家一

丁保甲須一丁供送則治生全然失力其間更有地少  
貧弱之人尤為不易伏望朝廷更賜采察又言今秋陝  
西田稼豐稔將來軍民必皆足食然收穫不可稍遲當  
如寇盜之至蓋子實纔熟即有雀鼠侵耗之害兼易為  
迸散遺落萬一忽遇風雨即所損極多緣今來少壯農  
夫多係保丁却以五日一次教閱及往還頗妨收穫伏  
望聖慈特與權住教閱候至將來收穫了畢即令補填  
權住過日數如此則公私不失其利亦使務農教戰各

得其時如臣言可采乞作聖意施行不報 提舉京東  
保馬霍翔言買馬法無過八歲及十五歲給公據斥賣  
竊以壯馬十歲方壯牝馬十七歲猶生駒乞許買十歲  
以下壯馬十三歲以下牝馬十七歲以上斥賣馬錢先  
以提舉司錢代支民戶均助錢令隨役錢納民有物力  
在鄉村而居城郭謂之遙佃戶欲乞鄉村保甲養保馬  
均出助價及單丁女戶見與保甲同等第人第三等以  
上推排主養官戶守官在外及第四等以下女戶單丁

止出助錢寺觀有物力乞依附戶從之仍下京西路施行翔又言約京東路齊淄青鄆密濰六州產馬最多可減為五年濮濟兗沂徐單曹州淮陽軍南京產馬差少可減為七年登萊二州馬雖多往往不及格可依舊十年取足詔五年者展為六年七年者展為八年餘依奏有

志

壬戌戶部言河北轉運司借支河北糴便司封樁及舊糴便司三司封樁六十餘萬石無寬剩錢物撥還乞除



放詔通限十年還 詔自今春秋釋奠以鄒國公孟軻  
配食文宣王設位於兗國公之次荀況揚雄韓愈以世  
次從祀於二十一賢之間並封伯爵況蘭陵雄成都愈  
昌黎初晉州州學授陸長愈言近封孟軻為鄒國公謂  
宜春秋釋奠與顏子並配下太常而太常少卿葉均博  
士盛陶王古楊傑辛公祐謂凡配享從祀皆孔子同時  
之人今以孟軻並配非是禮部看詳唐貞觀二十一年  
詔以漢伏勝高堂生晉杜預范甯之徒二十一賢與顏

子俱配享孔子廟堂至今猶為從祀豈必其同時人也  
孟子於孔聖之門當在顏子之列久未配食誠為闕典  
伏請自今春秋釋奠以鄒國公孟子配食荀況揚雄韓  
愈並以世次先後從祀於左邱明等二十一賢之間左  
邱明至范甯等二十一人並封伯爵乞荀況揚雄韓愈  
亦封伯爵自國子監及天下至聖文宣王廟皆塑鄒國  
公像其冠服同兗國公仍畫荀況等像於從祀之列荀  
況在左邱明之下揚雄在劉向之下韓愈在范甯之下

冠服各從封爵均等又以為非是禮部言均等援據不經無足取者於是從禮部議而有是詔又詔學士院修

撰贊文

據林希傳此議實自希出希時為禮部郎中墨本此時已從禮部所請朱本又加詳焉而哲宗

實錄新舊本並於元豐八年三月二十八日辛酉書詔孟子同顏回配享文宣王荀卿楊雄韓愈同左邱明從祀令學士院修撰贊文似重複也蓋三月二十八日但四日既有詔矣今并見于此兩紀並書於此

詔諸路帥臣監司等舉大使

臣為將領

癸亥御史蹇序辰乞下江西提舉鹽事司考校諸州軍

同提舉管勾兼監官功狀比租額多者比附福建路近  
例擬定行賞詔下司勲施行 提舉京西保馬司言本  
路養馬十五年數足乞每都先買二十匹限歲終足許  
本司較量知在能否聞奏陞黜詔依元降年限每年買  
及一分

志有

甲子詔京西京東路民已養戶馬者免保馬 廣南東  
路轉運司言軍賊藍載等除虔梅二州人外其餘皆汀  
州人乞下福建路提點提刑司及汀州協力捕殺詔兩

路監司合兵捕逐毋擅招誘如逗遛養寇當不用常法  
停竄 尚書省言自行官制以來諸寺監不治外事唯  
大府寺市易案事與諸路相關看詳興置市易當令所  
在官司量度州縣閑要遇賤則買遇貴則賣元置市易  
詔半夏出息一分一年以上出二分然所在物價增減  
難以期定而一州一縣價所增減相去亦必不甚遠則  
貨或積而難售所在州縣物價不同又不能遍知今若  
每旬令一路州軍估定物價報提舉司提舉司報轄下

軍州州下所屬榜募人出抵當或見錢市易司收息一分至二分令商人自賣則官收二分之息又有餘利以資販者則商賈流通貨無堙滯稅額敷羨物價常平若無可抵當而貨須變易者但不虧元價亦賣詔具為令乙丑禮部乞六曹於所隸寺監寺監於所隸司局各許抽摘點檢稽遲者稱事書罰或上簿上下半年各取索點檢從之詔廣南西路總略司管勾機宜文字承議郎程節為朝散郎勾當公事宣德郎程遵彥為通直郎

知融州西頭供奉官閣門祗候溫杲都巡檢西頭供奉  
官劉舜賓王口寨監押右侍禁杜臨各遷一官餘遷官  
減磨勘年賜緡有差經略使熊本上招納融州溪峒通  
道置驛功畢故賞之

十二日賜本銀緡  
八月一日可考

神虎都虞候

呂彊免解發并戰功陞五資換內殿承制為涇原路第  
十一部將

丙寅上批付劉昌祚夏人昨者不承詔命繼舉大衆攻  
圍蘭州傷夷敗散續為諸路討擊勢頗摧喪近於本路

出沒又為邊吏斬其酋豪自此忿氣應更增倍若不開示招徠深慮蜂蠆有毒困獸猶搏用兵未有休時卿可相度具可與不可開導朝廷恩意以聞 中書省言熙

寧二年天下應有馬十五萬三千六百三十四詔兵部取索內外馬數比較以聞 詔給末鹽錢鈔三十萬緡

為河東路轉運司糴本 熙河蘭會路經略安撫制置

使李憲奏勘會熙河岷通遠四州軍百物踴貴米斛四百七十足今幸二麥有十分之望經制司全無糴本臣



欲乞於賞功不盡縮內支撥縮二十五萬匹剗刷借支錢五萬貫并採買木植司借支錢五萬貫及乞下權茶司於熙州借撥見錢一十五萬貫通以五十萬貫匹赴時收積軍實從之

御集

丁卯提舉京西路保馬司言體問上等戶私馬有三兩匹者願盡印為保馬乞許養至三匹除役錢保內巡宿催稅甲頭等依元法減免外以所養馬每匹各聽次丁一人準法公私罪杖非侵損於人者用贖從之京東路

準此

五年二月五日丁巳霍翔陳請已移入七年二月八日

賜綾錦院營御厨

營修三省六房院初三省吏自言樞密院昨置五房院主事以下集居公私以為便三省總領中外之事理宜謹密乞於舊城內置官舍以備緩急付受行遣詔置三省六房院令錄事至令史集居至是以營地賜之後不果置御史蹇序辰言聞知杭州張詵於部下雇乳婢留三月限滿其夫取之詵乃言元約三年其夫訴于轉運副使許懋取契照驗實三年也始悟引致人見罔挾

刃往刺既不相遇旁中四人卒與俱死杭人寃之望下  
本路體量如實乞行顯罰詔提點刑獄司考實以聞後  
提點刑獄司言無之其奏遂寢 詔文臣中大夫武臣  
諸司使以下致仕更不加恩 以邕州延衆寨為富州

按元豐九域志富州廢於開寶五年省馬江思勤二縣  
入龍平隸昭州三朝地理志同不知何故復置富州又  
不知何年  
仍廢當考

欽定四庫全書

續資治通鑑長編卷三百四十六

宋 李燾 撰

神宗

元豐七年六月己巳朔詔御史中丞侍御史殿中侍御史就臺劾右班殿直皇甫旦仍命中書舍人蔡京右司員外郎路昌衡同治上初手詔李憲曰回鶻與吐蕃近世以來代為親家而回鶻東境與達靼相連近日諸路

採報多稱夏人苦被侵擾若因二國姻親之故乘漢蕃  
連和之際假道通信厚以金帛撫結俾為我用則亦可  
爭張彼之兵力不得悉衆南下不為無助况聞達靼之  
俗獷悍喜鬪輕死好利素不為夏人所屈若不吝金繒  
厚加恩意勢或可動爾宜選擇深曉蕃情及善羌語使  
臣三兩人計會鄂特凌古令選遣二三親信首領同諭彼  
令多發勁兵深入夏境討之仍邀彼首領入漢受賞宜  
詳度以聞又詔曰昔吐蕃當唐至德已後其彊若不可

嚮邇以蜀地遠絕其民綿懦弱無可經營之理而韋臯  
在成都乃能以計睽南詔之好使離彼親我卒收功西  
境東得城鹽之利吐蕃緣此其勢日蹙況今達靼之彊  
仇彼如此與異牟尋豈同日語哉宜力經營之憲奏自  
古控馭外國使其左枝右梧為備不暇盖由首先結其  
旁國絕其外交然後連橫之勢常在中國彼有犄角之  
患昔南詔之盛韋臯馭得其術故西復鶴州自是吐蕃  
日加窮蹙以今夏賊之彊固不逮吐蕃若以青唐輝爾

達勒達連橫之勢豈易枝梧況達勒達人馬獷悍過於西戎兼與夏人仇怨已深萬一使為我用不獨爭張夏人兵力不得悉衆南下兼可以伺其間隙使為搗虛之計如去歲舉國嘯聚於天都則河西賊衆為之一空若以青唐輝和達勒達三國人馬併攻其背就使未能遠趨賀蘭其甘涼瓜沙必可蕩盡臣仰奉睿訓審究利害惟忠將命未有可副遣使之入緣深入絕域經涉三國萬一踈虞適以為累夙夜思慮致力經營於是憲選旦押輝和

達勒達首領赴闕上復命齋詔還諭董戡鄂特凌古出兵憲  
恚事不出已使其屬鍾傳李宇作奏言且難以集事必  
無可為之理與初奏不同旦入蕃為首領經沁伊達木凌

節薩卜賽且木沁等所給止塚山寺不得前又妄奏獲賊功

狀上察之故命追旦等付獄

御集四月二十八日入蕃  
勾當回使臣皇甫旦可令

乘遞馬  
赴闕

太中大夫龍圖閣待制知江寧府陳繹免除

名勒停追太中大夫落龍圖閣待制知建昌軍子承務  
郎彥輔衝替繹坐前知廣州作木觀音易公使庫檀像



私用市舶乳香三十斤買羊麝價為絹二十八匹上言

詐不實彥輔坐役禁軍織木綿非例受公使庫饋送及

報上不實也

舊紀書知江寧府陳繹以賊落龍圖閣待制知建昌軍新紀削去

戶部

言準批狀提舉汴河司言畿內諸縣民間茶鋪亦乞請

買水磨官茶其法施於京師衆以為便府界宜與輦轂

下不殊從之候二年立法

實錄載此事不詳乞請買官茶今用紹聖編錄策增入水

磨二字庶易曉水磨茶法何年始要見實月日六年二月二十七日八月十二日可考似初置水磨時更詳之

紹聖元年九月二十八日敕中書省送到戶部狀準敕勘會元豐中嘗置水磨茶出賣與在京鋪戶故京師食

茶無夾雜之弊而茶商無留滯之患官歲收息計二十  
餘萬貫元祐中悉皆罷廢臣等欲乞參酌舊制重行興  
復三省同奉聖旨水磨茶應興復合行事件令戶部疾  
速先具措置中尚書省九月二十八日三省同奉聖旨  
並依戶部所中差孫迴提舉檢會舊行水磨日前後條  
制參酌今來合行及改到分項內一檢準元豐七年六  
月一日敕中書省尚書省送到左部狀準都省批下都  
提舉汴河堤岸司奏勘會本司近準朝旨在京賣茶人  
戶不許擅磨末茶並令赴本司水磨請買斤茶歸鋪貨  
賣本司已依朝旨施行近日據府界諸縣茶鋪等人戶  
赴司陳狀為見在京茶鋪之家請買水磨末茶貨賣別  
無頭畜之費坐獲厚利其府界茶鋪係與在京鋪戶事  
體一般乞依在京茶鋪人戶例赴水磨請輸歸逐縣貨  
賣及依在京茶法禁止私磨茶貨本司今勘會自興置  
水磨後其內外茶鋪人戶各家免雇召人工養飼頭口  
諸般浮費及不入末豆荷葉雜物之類和茶委有利息

其民間皆得真茶食用若比自來所買鋪戶私磨絞和偽茶其價亦賤兼販茶客人亦免民間賒欠錢物赴本司入中茶貨便請見錢再行興販甚有利潤沿路往來所收商稅不少今來已準朝旨並依本司奏請立法自推行以來其鋪戶例各比元供請買茶數外甚添斤重請輸蓋為獲利極多故府界諸縣茶鋪等戶有伏乞依在京例請買水磨茶貨禁絕私磨本司有詳若依逐縣人戶所陳即委是止絕外縣添和茶法及免經久却生弊端并侵在官茶法誠為利便如賜施行即乞依下項約束令取進止後批五月八日送戶部勘當并小貼子稱勘會客人販到茶貨指往府界諸縣販賣今來既已立限陳首給引入京赴水磨場中賣其到京合納稅錢亦乞依自來條例勾收送納入官戶部勘會下項事仍連元狀六月一日奉聖旨並依請一依敕命指揮施行仍開合屬去處牒件如前請詳前項尚書戶部牒內聖旨指揮施行仍開牒應干合屬去處者一客人興販

茶貨係於諸路外應係往府界及在京者委產茶山場  
州軍出引並皆赴京官場中賣即不得沿路及府界地  
分貨易如違告首罪賞並依私贖茶法一諸路末茶不  
得入府界地分貨賣如違即依本司印出在京茶法施  
行已上本部勘當欲依  
本司奏乞事理施行

詔河東路銷廢五指揮禁軍

錢糧即非一路兵額有闕數衣糧之比並封樁以給提

舉保甲司起教之費

御集載此尤詳今附見提舉河東路保甲司奏併廢禁軍五指揮歲

省衣糧料錢郊賞草料等本司即未審依今來轉運司牒支充額外招添兵士請受為復只依先降朝旨充起教保甲支用上批勘會上項銷廢五指揮兵員樁管衣糧之比顯是轉運司未能如此分別曉悉縷細再三申明行下仰疾速支撥付

詔五路提舉保甲司已撥常

提舉保甲依舊樁管

平糧準備賑濟令相度保甲遇災傷不及五分當如何等第賑濟條具以聞其後提舉河東路保甲王崇拯言賑濟災傷保丁四等以下本戶災傷及五分以上即依常平司七分以上法從之河北陝西開封府界准此

辛未朝議大夫知荆南孫頎直龍圖閣知廣州初除朝奉大夫鴻臚少卿陳睦為寶文閣待制知廣州給事中韓忠彥言睦性行貪猥才識昏短偶緣泛海之勞僥倖至此擢置侍從實玷清班詔罷睦以命頎 賜董戢鄂

特凌吉所部人傷中絹千疋 御史蹇序辰言去年五月

舉行大理寺長貳親訊獄及十日慮囚格聞長貳並不

親慮望更案實詔大理寺分析

朱本  
削去

壬申朝散郎龍圖閣待制熊本試吏部侍郎初宜州蠻

擾邊本以知桂州始至即戒邊吏毋輒生事勞問溪峒

酋長人人得其心乃請選將練土兵以代戍卒益市馬

以足騎兵宜州遂無事而朱崖黎人之圍解土人蔡寶

珍導隆蕃引兵與熟戶訟欲取以為功本問之色動縛

寶珍投海上夷人以為神謀者云交人將以明年入寇使者實其言詔問本曰安南使人在道不應有此藉令有謀不應先使人知後果妄初郭達宣撫安南劉九以廣源郡建為順州朝廷以為不足守詔給賜李乾德疆畫未明而交人狃窺宜州之隙欲并取儂智會勿陽地搗虛掠歸化逐智會智會竄右江乞師本遣使問狀交人為斂兵乾德謝罪本請賜以宿桑八峒不毛之地嶺表為安

六月四日已書本試吏侍七月二十八日又詔本措置交趾邊防八月九日又書本試吏侍蓋

六月四日既除吏侍尋以邊事留桂州八月九日又申命耳八月二十一日戊子十月二十二日戊子可考五年七月八日本以龍制知桂州今年五月庚戌賜獎諭

詔知滑州俞希旦通判

蘇注各減磨勘二年賜銀絹百造浮橋成賞之也御

史憲序辰言畿內縣民相繼被彊盜畏憚無敢告發乞案驗巡捕官曠慢不職重加黜責詔開封府界提點司

究實以聞奉議郎右司員外郎范純粹權發遣河東

轉運副使已而不行

七月四日復為右司郎中

癸酉權發遣河東路轉運使朝散郎苗時中為直龍圖



閣知桂州 詔春銓試中第一人循一資第三人占射  
差遣中等八十九人不依名次注官下等四十五人注  
官 詔已遣朝奉郎任公裕往發運司刷磨見欠內庫  
錢慮公裕顧避根究滅裂可續遣入內供奉官謝裡同  
根究 福建路提點刑獄李茂直言槍杖手李杭闖敵  
殺獲軍賊藍載等十八人詔將官彭鐸等所領應募兵  
民各發歸元來去處上殺獲正賊人功狀 詔封樁糧  
草依年次以新物兌換 同提舉河北東路保甲劉定

言李寧久領河北保甲及曾兼領陝西保甲盡心宣力  
冒暑得疾身亡乞厚賜軫恤使其家屬不致失所詔李  
寧自朝廷推行保甲教事已來用心其間宣力為多可  
止作朝廷特有處分賜絹五百匹本家

甲戌禮部言親郊之歲夏至祀皇地祇於方丘遣冢宰  
攝事禮容樂舞謂宜加於常祀而其樂簋二十樂工百  
五十有二舞者六十有四與常歲南北郊上公攝事無  
異殆未足以稱明詔欽崇之意乞自今親郊之歲方丘

所用樂舞準親祠用三十六簋工人三百有六舞人百三十有四從之又言歐陽修等編太常因革禮始自建隆訖於嘉祐為百卷嘉祐之後闕而不錄熙寧以來禮文制作足以垂法萬世示下太常博士接續編纂以備討閱從之

朱本又於九月二十三日已未書續因革禮今止就此出之

乙亥手詔李憲近聞西蕃首領董戩已於年前十月亡歿兼鄂特凌古曾使人諭邈川溫錫沁令西望燒香事緣董戩世受朝廷爵命其存亡理須當知未審經略制置

司曾與不曾承準本蕃遣人傳報及伺問得即今繼立

者為誰疾速以聞

六年十月末董戡死鄂特凌古立王  
鞏甲中雜見云劉晦叔显言鄂特凌古

本不當立因私其國母而得立大臣溫錫沁常不協密  
遣腹心詰王文郁乞內附文郁請于朝神宗曰此欲我  
為渠援爾但善加撫慰而已亦以夷狄攻夷狄之道也  
邊臣老将嘆服磨算於是終元豐置而不論紹聖初孫  
路亦以為可納章子厚除路漕陝西將行問安厚卿李  
邦直厚卿曰先帝不納豈無深意耶邦直曰路好官職  
一至如此既至永興但見路與鍾傳對榻而寢者一月  
一日傳謂晦叔曰此事次難為得之易守之難也其後  
鍾傳被召具言不可子厚亦意緩後鍾傳坐冒賞貶逐  
又造成其議鞏所記如此當考孫路除陝西在紹聖二  
年正月十三日按董戡死既二年至元祐元年正月十  
八日乃降詔許鄂特凌古承襲二年八月末蘇轍奏論鄂

特凌古承襲事似得之王輦也當考

御史劉拯乞大理寺開封府左右

廂軍巡府皆置門簿凡追送人具人數事目知在斷放並末書結絕從之令刑部立法禮部言親祠儀注事

太廟祀圜丘皇帝並服靴袍至大次伏緣車駕自太慶殿赴景靈宮太廟翌日赴南郊並服通天冠絳紗袍且祀以進為文宜有隆而無殺前一日既盛服以赴祠所及行事之旦所謂三日齋一日用之者也乃服靴袍至大次未協禮意謹案郊特牲曰祭之日王皮弁以聽祭

報報謂小宗伯告時告備也說禮者以通天冠猶古之皮弁則通天冠者齋服也今禮部奏中嚴外辦所謂告時備者也伏請太廟圜丘祭日之旦自齋殿赴大次殿服通天冠絳紗袍從之

丙子詔陝西三銅錢監所增鑄折二錢每監以五萬緡為額息錢賜轉運司涇原路經略司言西賊奔衝過塌嶺公德順軍第十七堡巡檢東頭供奉官王友戰死詔贈友皇城副使以三資官其子仲安仲堅仲淵並為

三班借職

舊紀書丙子夏人寇德順軍巡檢王友死之新紀同

丁丑詔河東鄜延環慶路各發戶馬二千匹以給正兵河東路可就給本路鄜延路以永興軍等路環慶路以秦鳳等路其少數即以開封府界戶馬如尚少內鄜延路仍以京西路坊郭戶馬所發馬官買者給元價私買者分三等上三十千中二十五千下二十千以解鹽賣錢阜財監應副市易錢先借支開封府界以左藏庫錢餘以本路錢專管勾官開封府界委范岫河東范純粹

秦鳳等路李察永興軍等路葉康直其買過戶馬限三

年

七月六日可考本志云七年詔發戶馬河東鄜延環慶路二千以給正兵河東路就給本路鄜延路以永

興軍等路環慶路以秦鳳等路及開封府畿戶馬益之鄜延即益以京西坊郭戶既給正兵後遂不復補實錄

無既給正兵後遂不復補此合增修

已卯乾寧軍言軍居河流之間隄防之內欲應有違犯  
若自大城越至本軍或自本軍越過河東之類並依已  
至越所未渡法并兩河自依私渡法從之 權發遣提  
舉河北東路保甲劉定權發遣同提舉河北路保甲



庚辰知河南府韓絳言臣伏覩頒行保甲養馬敕京東限十年京西限十五年數足令提舉保馬官呂公雅須令作七年收買又令每都保先選二十匹是將十五年合買之馬作二年半買足恐非朝廷經始之意京西北不產馬民又貧乏乞許於元限減五年詔提舉京西路保馬司遵守元降敕限

五月二十三日七月二十三日可考本志同此

蘇州言資政殿學士太子少

保致仕元絳卒絳工於文辭為流輩所推許上以此厚遇之在中書蕃夷書詔多出其手景靈宮作神御十一殿夜

傳語草上梁文進明以進既得謝上謂曰卿可營居京師朕  
資卿金幣且使耆寧仕進絳惶恐謝曰臣有田廬在吳歸可  
售即築室都城得望屬車之塵幸矣何敢冀賜邪行次近  
郊上遣近侍賜白金千兩及卒輟視朝贈太子少師謚章簡  
上得其遺奏憫惜之出示執政曰此必絳之文也詔其家集  
平生文章上之

林希云絳自太子少保贈太子少師贈  
官不出本品自絳始先是胡宿自太子

少傳歐陽修趙槩自太子少師贈太子太師三  
人皆以受遺故優贈之非常典也附注當考

辛巳內藏庫使忠州刺史彭孫為皇城使西頭供奉官

閤門祇候張直為內殿承制內殿崇班姚雄潘逢楊拱各  
遷兩官桑湜高士言胡仕清郭成陳元姚師閔各遷一官  
從姚麟出塞功也

彭孫十一月乙未  
又遷果州團練使

知太原府呂惠卿

言本路歲認糴穀十萬石送廊延路支移太遠民不便之  
乞罷應副止令陝西轉運司自計置其價錢依河東路元  
降指揮於垣曲監撥還詔范純粹孫覽相度以聞純粹  
言河東出糧至廣乞且令應副候邊事息追還將兵別自  
朝廷詳酌指揮覽言乞責逐路自辦仍免於垣曲監償糴

價詔令河東陝西各計置五萬石詔支垣曲監錢 賜廣

南西路經略司度僧牒二百應副融州新招納溪峒置堡

寨 詔沿邊主兵官雖因非衝替差替若在任勾當得力

藉才不可輟去許經略司保明奏裁

五月一日  
可并此

壬午詔西京左藏庫使吉州刺史入內副都知石得一以所賜

管地建僧寺賜迎祥院為額遇同天節度僧一人 詔自今開封

府免後殿起居以戶部尚書王存言自官制行戶部尚書侍

郎領三司長貳職事止赴前殿起居唯知開封府依舊赴後殿

緣知府於後殿非供奉職司而實廢決事時刻故有是詔

癸未權發遣京西轉運判官沈希顏言前官任內為財用不  
給借過南北路提舉司坊場錢三十萬緡立限四年撥還乞  
自元豐八年歲償五萬緡從之 詔李憲乞選差蘭州守城  
小使臣五人赴安彊米脂塞門浮圖義合塞計度守備委劉昌  
祚以名聞李憲毋得占留 鄜延路經略司言諜報西賊今秋  
必為大舉之計乞下諸路防戒詔陝西河東經略司檢會累降  
朝旨選差信實人深入體探過為之備具措置方略以聞

甲申京西路轉運司言準敕兩路提舉常平司各借十萬緡與轉運司官自筭請般賣解鹽乞本路民已買解鹽盡數買入官從之解鹽已權賣商人許其販易今京西轉運司又為權法鹽之過洛者皆苛留入官使輸錢然後放行蓋沈希顏掊克以牟利商旅苦之後不復行

朱本簽貼云前史官以為掊克皆無照驗文字持出於史

官私意合刪新本已復存之今從新本又御集京西路轉運司奏狀伏見解鹽之法客人就解池請鹽至西京每席約有一貫以上淨利般至襄郢州約收息二貫計有淨利錢二十萬貫添助財用御批宜下戶部限三日勘當如別無違礙事理即依所奏疾速施行元豐七年六月十六日下本志載此事與實錄御集同但出沈希顏姓名耳

詔已降五陣法令諸將教習其舊教陣法並罷蓋九軍營

陣為方圓曲直銳凡五變是為五陣

元祐元年二月十六日復教御陣

乙酉禮部言親祠祝策文云謹以犧牲粢盛嘉齊庶物

恭薦歲事宜並準曲禮備舉牲幣粢盛之號又五福十

太一祝板青詞稱嗣天子臣某謹案古之祝辭以天子

至尊雖祗事天地宗廟示民嚴正蓋未有稱臣者故禮

曰踐阼臨祭祀內事曰孝王某外事曰嗣王某內謂宗

廟外謂郊社大戴禮載祀天祝文稱余一人某漢承古

禮稱天子以事天其贊饗辭又曰皇帝魏明帝始詔祀  
天地明堂五郊可稱天子臣某東晉賀循製策祝文稱  
皇帝臣某沿襲至今蓋用魏晉之制本朝儀注祀儀於  
上帝五帝日月皆稱臣至於五福太一與九宮貴神皆  
天官也近制亦稱臣檢會九宮貴神祝板進書已不稱  
臣五福太一當依熙寧六年以前故事其被遣之官  
自宜稱臣如此則不失輕重之體又先農正座帝神農  
氏祝文云以后稷配神作主配座后稷云作主侑神謹



案春秋公羊傳曰郊則曷為必祭稷王者必以其祖配王者則曷為必以其祖配自內出者無匹不行自外至者無主不止何休曰天道闇昧故推人道以接之然則古者作主配神之意本施於祖宗其間有雖非祖宗而祝辭可以言作主配神者如五人帝之於五天帝是推人道以接天神勾龍之於社后稷之於稷是推人道以接土穀之祇其祝辭俱云作主可也若並為外祭而正配座又皆人鬼則以正座為主其配座但合食從祭而

已伏請於神農祝文云以后稷配於后稷云配食于神  
高禰以伏犧高辛配祝文並云作主配神神無二主伏  
犧既為主其高辛祝文伏請改云配食于神並從之

丙戌朝議大夫管勾靈作觀蔡伯侑言昨未分司以前  
在分司年分并令朝見通經兩南郊乞奏補子孫詔伯  
侑幼嘗侍仁宗特許之 賜都水監度僧牒二百應副

滑州諸埽梢草 朝散大夫工部郎中范子奇為左司  
郎中建言天下事六曹不得專者上尚書省類非細務

必郎中互闕付受不當委開拆房吏同僚異議乃奏取  
決上曰子奇之言是矣此豈吏所得專耶於是左司郎

中闕即以命子奇

韓駒云舊左右司人吏皆本廳郎官於諸官府指差其後用堂後官有旨

都司上事令吏錄事以狀通賀餘並參謁又文字初下止用吏人閱視分房其後有旨輪都司一員受諸處文字皆范子奇啟請蔡確奏行之也

戊子集禧觀使王安石請以所居江寧府上元縣園屋  
為僧寺乞賜名額從之以報寧禪院為額或云安石愛  
其子雱雱性險惡安石在政府凡所為不近人情者雱

實使之既死安石哀悼久而不忘嘗恍惚見雱荷鐵枷如重囚狀遂請以園屋為僧寺蓋為雱求救於佛也

據此

邵氏見聞錄增入

已丑廣南西路轉運司言民戶逋鹽稅錢加糴米其縣令佐監當官雖得正官交替乞並住給請受勒令催理候足日放罷從之納外欠不滿五分即放罷 永興軍

路提點刑獄司言軍賊王冲久於商虢州界作過除依條立賞外乞親捕獲人與班行官員設方略或聞敵捕

殺徒伴優與遷官并召募土人日支錢米選捕盜官統領令分路入山緝捕從之 詔元豐三年開封府界諸縣所管保甲二百八十都保計六萬八千八百六十三人今方及三年所少人丁一萬已上未知減落因依可令提舉保甲司分頭委官及責勒令佐根究緣故具奏

此據御集  
付劉瑄

庚寅蕃官莊宅副使高永堅為右驍驎副使文思副使許利見為左藏庫副使內殿承制雅爾為供備庫副使

內殿崇班吹恭為內殿承制河東經略司上出西界逢賊戰功推賞也 詔將副遇調發如無親屬許奏帶親隨二人亦給遞馬帶親屬親隨不得過二人毋得以命官有差遣人修入將敕

辛卯權知誠州周士隆言準詔酬賞招納溪峒開修道路有功人第一等劉錫田延邈何廣各賜絹三十錫等蹈涉危險極為勞差田延邈乞與改官劉錫何廣乞各與名目今在新路堡寨勾當詔延邈遷一資錫下班殿

詔稅務年終課利增額依鹽酒務賞格從

京西轉運司請也

元祐七年八月五日蘇軾言可考

詔贈故崇信軍

節度使任澤墳寺歲許度僧二人澤任夫人弟也

新本削去

朱書

廊延路經略司言準朝旨措置禦敵利害今並邊

六將已駐要害之地兵勢相連又欲以萬餘人屯金明

寨以備諸將緩急從之

新本削去朱書

武昌軍留後江夏郡

王知大宗正事宗惠卒贈昭德軍節度使開府儀同三

司追封剡王謚勤孝

壬辰禮部請如太常丞呂升卿言大禮受誓戒以平明  
左僕射誓文武官於朝堂右僕射誓宗室於太廟從之  
賜專一管勾製造軍器所度僧牒千五百買木修置  
京城四御門及諸甕城門幫築圍敵馬面并給役兵官  
吏餐錢

甲午知蔡州黃好謙言所部水災特甚乞放秋稅詔戶  
部速行

乙未以安化軍節度使同知大宗正事高密郡王宗晟



知大宗正事相州觀察使宗景同知大宗正事 手詔

李憲今歲自仲夏已後陰氣僭常淫雨作沴深慮秋杪  
羗賊聚衆不測侵軼須宜過有防慮仰熙河路經略司  
安撫措置司檢會朝廷前後累降指揮枝備大敵丁寧  
約束自此月已去月日不多旦夕加慮諸事謹為隄防  
措置切宜謹重勿貽朝廷西顧之念

朱本增入  
新本削去

戶部

言陝西軍須經費初令經略轉運司通管後朝旨應干  
軍須及前後撥賜及見在經費錢物並付轉運司通收

一切支費自管認勘會王欽臣言王震會定之法亦未  
可行今葉康直等詳度乞以逐路沿邊糴買並依王震  
會定法王欽臣續奏乞依李察所請環慶一路並以王  
震元定物價交與環慶經略司候及一二年成法即乞  
諸路遵守詔依葉康直李察所奏

朱本削去正月十九日又二月二十七日

當考朱本并此於二月二十七日却盡削此更詳之或存此削彼

河東路經略使呂

惠卿言本路兵馬準朝旨團成十二將欲以太原府封  
樁軍器於逐將所過州軍排梁封樁從之詔府界保

甲司市按賞銀母得抑配

丙申詔應經併廢州縣今復舊者具元建議官職位姓名以聞上以併廢州縣出於使者欲以增剩役錢為功

故令考察

朱本改欲以增剩役錢為功但云妄有申請今從舊文

